

四庫全書

史部

欽定四庫全書

水經注釋卷七

仁和趙一清撰

濟水一

濟水出河東垣縣東王屋山為沘水

山海經曰王屋之山聯水出焉西北流注于秦澤郭
景純云聯沘聲相近沘即濟也潛行地下至共山南
復出于東丘今原城東北有東丘城孔安國曰泉源

為沈流去為濟春秋說題辭曰濟齊也齊度也貞也

風俗通曰濟出常山房子縣贊皇山廟在東郡臨邑

縣濟齊其度量也余按二濟同名也所出不同鄉源

亦別斯乃應氏之非也

一清按漢書地理志河東郡垣縣禹貢王屋山在東北沈

水所出其山載禹貢導沈水文俱作涕字又常山郡房子縣贊皇山石濟水所出說文云涕沈也東入海

又云淪水出常山房子贊皇山東入泚漢人學有師承孟堅地志叔重說文尤精覈謹嚴千古取證應仲

瑗始誤以出常山之濟為四瀆之涕善長非之是矣而猶云二濟同名未免騎牆之見也江南徐鍇撰說

文繫傳通釋云漢書房子縣贊皇山濟水所出東至廩陶入泚此非四瀆之濟四瀆之濟古皆作涕今人

多亂之又云沛水今多作濟故與常山濟水相亂此則四瀆之沛楚金辨沛濟二字可謂了了足以證明孟堅而羽翼叔重然不云常山石濟而單云常山濟水猶有所蔽乃元吳澄書纂言云導水章所叙冀州之濟兗州之濟實一水也濟沛二字通用說文因二字而以北濟南濟為二水非也今說文具在何嘗有南濟北濟之分且全不考水道之源委果于自信輕毀古義厚誣前哲如此唐徐堅初學記云二濟既南北異岸相去亦踰千里渠雖習尚詞章今濟水重源尚能別白不似草廬解經反致胡亂也

出温城西北平地下水有二源東源出原城東北昔晉文公伐原以信而原降即此城也俗以濟水重源所發因復謂之濟源城其水南逕其城東故縣之原鄉

杜預曰沁水縣西北有原城者是也南流與西源合
西源出原城西東流水注之水出西南東北流注于
濟濟水又東逕原城南東合北水亂流東南注分為
二水一水東南流俗謂之為衍水即沔水也衍沔聲
相近傳呼失實也濟水又東南逕郟城北而出於温
矣其一水枝津南流注于淇水出原城西北原山勳
掌谷俗謂之為白澗水南逕原城西春秋會于淇梁
謂是水之墳梁也爾雅曰梁莫大于淇梁梁水堤也

溟水又東南逕陽城東與南源合水出陽城南溪陽亦樊也一日陽樊國語曰王以陽樊賜晉陽人不服文公圍之倉葛曰陽有夏之嗣嗣典樊仲之官守焉君而殘之無乃不可乎公乃出陽人春秋樊氏叛惠王使虢公伐樊執仲皮歸于京師即此城也其水東北流與漫流水合水出軹關南東北流又北注于漫謂之漫流口溟水又東合北水亂流東南左會濟水枝渠溟水又東逕鍾繇塢北世謂之鍾公壘又東南

塗溝水注之水出軹縣西南山下北流東轉入軹縣
故城中又屈而北流出軹郭漢文帝元年封薄昭為
侯國也又東北流注于溟溟水又東北逕波縣故城

北漢高帝封公上不害為侯國

一清按史表作波侯
漢表作汲侯索隱曰

波與汲並縣名屬河內蓋莫
能定也善長從史表書之

溟水又東南流天漿澗

水注之水出軹南鞏向城北城在鞏上俗謂之韓王

城非也京相璠曰或云今河內軹西有城名向今無

杜元凱春秋釋地亦言是矣蓋相襲之向故不得以

地名而無城也關駟十三州志曰軹縣南山西曲有

故向城即周向國也傳曰向姜不安于莒而歸者矣

全氏曰按左傳盟向之向在周圻內杜所云軹縣者也姜之向地在莒州善長誤合為一汲郡竹

書紀年曰鄭侯使韓辰歸晉陽及向二月城陽向更

名陽為河雍向為高平即是城也其水有二源俱導

各出一溪東北流合為一川名曰天漿溪又東北逕

一故城俗謂之冶城水亦曰冶水又東流注于淇淇

水又東南流右會同水水出南原下東北流逕白騎

塢南塢在原上為二谿之會北帶深隍三面岨嶮唯西版築而已東北流逕安國城西又東北注溴水溴水東南逕安國城東又南逕毋辟邑西世謂之無比城亦曰馬髀城皆非也朝廷以居廢太子謂之河陽庶人也溴水又南注於河也

又東至溫縣西北為濟水又東過其縣北

濟水於溫縣西北與故瀆分南逕溫縣故城西周畿內國司寇蕪忿生之邑也春秋僖公十年狄滅溫

子奔衛周襄王以賜晉文公濟水南歷虢公臺西皇
覽曰溫城南有虢公臺基趾尚存濟水南流注于河
郭緣生述征記曰濟出河內溫縣注于河蓋沿歷之
實証非為謬說也濟水故瀆於溫城西北東南出逕

溫城北又東逕虢公冢北皇覽曰虢公冢在溫縣郭
東濟水南大冢是也濟水當王莽之世川瀆楛竭其

後水流逕通津渠勢改尋梁胙水不與昔同

通典曰
詳水經

所作殊為詭誕全無憑據按後漢郡國志濟水王莽
末因旱渠塞不復截河南過既順帝時所撰都不詳

悉其餘可知景純注解又甚踈畧又曰按後漢郡國志曰因王莽末旱此渠枯竭濟但入河而已不復截流而南水經是和帝以後所撰乃云南過滎陽封丘宛句乘氏等縣並合縣地一依尚書禹貢舊道斯不詳之甚酈道元又從而注之其所纂序及注解並大紕繆一清按杜氏兩言濟水水經及注之失一在雍州風俗下一在荊河州河南府濟源縣下然以經為和帝後所撰又云順帝時撰注則云景純又云道元何無定見也禹貢雖指解之曰河北之濟因旱而枯旱止則復出河南之濟為濁河所侵空竇盡窒河去不復能上涌故遂絕自東漢以迄唐初凡行濟瀆者皆河水也而猶目之曰濟是鵲巢而鳩居觚名而圍實也故杜氏力詆水經以為不可信然滎濟故道猶可因是而得其十之七八則此書不為無補焉黃文叔云濟水雖絕其瀆猶在雖中間經穿鑿變易或斷或續然水之附入於其瀆者猶可尋求緝之以存禹

迹非無理也斯言蓋得其平又曰濟濟之水自周以來九數變初為濟及導滎為川則滎與濟合鴻溝既開滎瀆為河所亂及滎澤又塞則所行者惟河水矣汴渠不通則鉅野以北所行惟荷汶戴村已築則東阿以下所行唯山泉溝澤之水其號為濟者襲舊名而已水經所叙瀆同而水異水異故李宏憲云河南無濟水瀆同故黃文叔云禹迹賴此而猶存言非一端各有所當今與人論濟水苟以為無則羣指七十二泉大小清河以相難若以為有則又據杜佑之說詆水經不當襲舊名為濟明道謂與公言如扶醉人扶得一邊起又倒却一邊真可笑又可憎也古文尚書疏證又為之解曰濟水當王莽時大旱遂枯絕不復截河南過者晉初司馬彪之言也雖經枯竭其後水流逕通津渠勢改尋梁胙水不與昔同者後魏鄜道元之言也通典據彪之言以折水經謂濟渠既塞都不詳悉其餘可知余讀郭璞山海經注而嘆恐未

足以服水經之心何則璞固有言矣今濟水自滎陽
卷縣東經陳留至濟陰北東北至高平東北經濟南
至樂安博昌縣入海與禹時濟瀆所經河南之道無
異蓋枯而復通者所謂津渠勢改昔則自魏公臺東
入河出在教倉之東南今改流自魏公臺西入河出
亦非故處與或禹時濟未必分南北此則分而為二
為不同與又潛丘劄記曰黃子鴻篤信水經注者憶
初晤碧山堂問曰後漢志溫縣濟水出王莽時大旱
遂枯絕是河南無濟今且千六百七十餘年矣何鄭
道元言之詳且析也子鴻曰新莽時雖枯後復見鄭
氏所謂其後水流逕通津渠勢改尋梁胍水不與昔
同是也祇緣杜君卿不信水經專憑司馬彪志竊以
為彪不過紀一時之災變耳非謂永不截河南南過也
君卿云云遂真覺河南無濟疑誤到今尚有宗主其
說者余曰枯而復通既聞命矣敢問除鄭注外抑別
有徵乎子鴻曰未聞余退而考杜預釋例云濟水自

滎陽卷縣東逕陳留至濟陰北經高平東平至濟北
東北經濟南至樂安博昌縣入海郭璞山海經註云
今濟水自滎陽卷縣東經陳留至濟陰北東北至高
平東北經濟南至樂安博昌縣入海張湛列子注云
濟水出王屋山為沁水東經溫縣為濟水下入黃河
十餘里南渡河為滎澤又經濟陰等九郡而入海粹
此三說以覆子鴻喜獲所未聞復難余今不見河南
有濟畢竟復枯于何代余復考得後漢書王景傳濟
渠下章懷注云濟水出今洛州濟源縣西北東流經
溫縣入河渡河東南入鄭州又東入滑曹鄆濟齊青
等州入海即此渠也王莽末旱因枯涸但入河內而
已似不知中有復通之事合以許敬宗對高宗濟水
潛流屢絕是唐以前濟已復枯竭直至今矣又曰有
問濟水枯而復通畢竟在何時予曰考王景傳曰初
平帝時河汴決壞未及得脩建武十年陽武令張汜
上言河決積久日月侵毀濟渠所漂數十許縣逮後

三十五年汴渠成明帝巡行下詔曰河汴分流復其
舊迹陶丘之北漸就壤墳此汴壞而濟亦壞汴治而
濟亦治之徵也又考晉書傅祗傳武帝時為滎陽太
守自魏黃初大水後河濟汎濫鄧艾嘗著濟河論開
石門而通之至是復侵壞祗乃造沈菜堰充豫無水
患郁超傳太和中桓溫將伐慕容氏引軍自濟入河
超諫曰清水入河無通運理毛穆之傳溫使穆之鑿
鉅野百餘里引汶會于濟此豈竟枯絕者哉大抵王
莽世天災雖甚然皆不遠而復班注云蓋以目驗
者言也祗緣司馬彪下語太重若改遂枯絕為曾枯
絕則妙矣潛丘東樵之言明白如此足以祛君卿之
惑其無累于柔鄒也明矣又孔穎達左傳正義曰按
檢水流之道今古或殊杜既考校元由據當時所見
載于釋例今一皆依杜雖與水經爭異亦不復根尋
也觀此則亦不以
濟水為竟枯絕也

屈從縣東南流過隕城西又南當鞏縣北南入于河

濟水故潰東南合奉溝水水上承朱溝於野王城西
東南逕陽鄉城北又東南流逕李城西秦攻趙邯鄲
且降傅舍吏子李同說平原君勝分家財饗士得敢
死者三十人李同與赴秦軍退軍退同死死封其父
為李侯故徐廣曰河內平臯縣有李城即此城也於
城西南為陂水淹地百許頃蒹葭萑葦生焉號曰李
陂又逕隕城西屈而東北流逕其城北又東逕平臯

城南應劭曰邢侯自襄國徙此當齊桓公時衛人伐邢邢遷于夷儀其地屬晉號曰邢丘以其在河之臯處勢平夷故曰平臯瓚注漢書云春秋狄人伐邢邢遷夷儀不至此也今襄國西有夷儀城去襄國百餘里邢是丘名非國也余按春秋宣公六年赤狄伐晉圍邢丘昔晉侯送女于楚送之邢丘即是此處也非無城之言一清按師古亦曰應說非也竹書紀年曰梁惠成王三年鄭城邢丘司馬彪後漢郡國志云縣有邢丘故邢

國周公子所封矣漢高帝六年

沈氏曰是七年

封碭郡長項

它為侯國賜姓劉氏武帝以為縣其水又南注于河

也

與河合流又東過成臯縣北又東過滎陽縣北又東北至礫磧南東出過滎澤北

釋名曰濟濟也源出河北濟河而南也晉地道志曰濟自大伾入河與河水關南洑為滎澤尚書曰滎波既瀦孔安國曰滎澤波水以成遏瀦闕駟曰滎嶧澤

名也故呂忱曰滹水在滎陽謂是水也

一清按滎滹之滹當作播

禹貢錐指曰滎波既諸史記作播漢書作波閻百詩云馬鄭王本並作播播是澤名不從山作滹可知也又說文滹水名在河南滎陽从水番聲晉官切不謂叔重有此大繆此與關駟以澗水為澗水正相似也

昔大禹塞其滹水而於滎陽下引河東南以通淮泗

禹貢錐指曰河與滎瀆相亂其來已久而滎澤在漢時依然無恙故班固云濟水軼出滎陽北地中謂滎澤也至東漢乃塞為平地鄙道元云云夫滎澤何以謂之滹水經曰滎波既豬禹方陂之以蓄其水何以塞之誕妄不足深辨全氏曰以鴻溝濟水分河東為禹迹善長之繆也而張垣等宗之

南流漢明帝之世司空伏恭薦樂浪人王景字仲通

好學多藝善能治水顯宗詔與謁者王吳始作浚儀渠吳用景法水乃不害此即景作所脩故瀆也渠流東注浚儀故復謂之浚儀渠也明帝永平十五年東巡至無鹽帝嘉景功拜河隄謁者漢靈帝建寧四年於教城西北壘石為門以遏渠口謂之石門故世亦謂之石門水門廣十餘丈西去河三里石銘云建寧四年十一月黃場石也而主吏姓名磨滅不可復識魏太和中又更修之撤故增新名字淪落無復在者

水北有石門亭戴延之所云新築城城周三百步滎陽太守所鎮者也水南帶三皇山即皇室山亦謂之為三室山也濟水又東逕西廣武城北郡國志滎陽縣有廣武城城在山上漢所城也高祖與項羽臨絕澗對語責羽十罪羽射漢祖中胸處也山下有水北流入濟世謂之柳泉也濟水又東逕東武武城北楚項羽城之漢破曹咎羽還廣武為高祖置太公其上曰下不下吾烹之高祖不聽將害之項伯曰為天下者

不顧家但益怨耳羽徙之今名其壇曰項羽堆夾城
之間有絕澗斷山謂之廣武澗項羽叱婁煩於其上
婁煩精魄喪歸矣濟水又東逕敖山北詩所謂薄狩
于敖者也其山上有城即殷帝仲丁之所遷也皇甫
謐帝王世紀曰仲丁自亳徙囂于河上者也或曰敖
矣秦置倉於其中故亦曰敖倉城也濟水又東合滎
瀆瀆首受河水有石門謂之為滎口石門也而地形
殊卑蓋故滎播所導自此始也門南際河有故碑云

惟陽嘉三年二月丁丑使河隄謁者王誨疏達河川
遂荒廢土云大河衝塞侵齧金隄以竹籠石葺葺土
而為塼壞墮無已功消億萬請以濱河郡徒疏山采
石壘以為障功業既就徭役用息辛未詔書許誨立
功府卿規基經始詔策加命遷在沅州乃簡朱軒授
司馬登令纘茂前緒稱遂休功登以伊洛合注大河
南則緣山東過大伾回流北岸其勢鬱懔濤怒湍急
激疾一有決溢彌原淹野蟻孔之變害起不測盖自

姬氏之所常感昔崇鮐所不能治我二宗之所劬勞
於是乃跋涉躬親經之營之比率百姓議之于臣伐
石三谷水匠致治立激岸側以捍鴻波隨時慶賜說
以勸之川無滯越水土通演役未踰年而功程有畢
斯乃元勳之嘉課上德之宏表也昔禹脩九道書錄
其功后稷躬稼詩列于雅夫不憚勞謙之勤夙興厥
職充國惠民安得湮沒而不章焉故遂刊石記功垂
示於後其辭云云使河隄謁者山陽東緡司馬登字

伯志代東萊曲成王誨字孟堅河內太守宋城向豹
字伯尹丞汝南鄧方字德山懷令劉丞字季意河隄
掾匠等造陳留浚儀邊韶字孝先頌石銘歲遠字多
淪缺其所滅蓋闕如也滎瀆又東南流注于泝今無
水次東得宿胥口水受大河渠側有扈城亭水自
亭東南流注于濟今無水宿胥在河之北不在此也
蓋名同耳自西緣帶山陞秦漢以來亦有通否濟水
與河渾濤東注晉太和中桓温北伐將通之不果而

還義熙十三年劉公西征又命寧朔將軍劉遵考仍
此渠而漕之始有激湍東注而終山崩壅塞劉公於
北十里更鑿故渠通之今則南瀆通津川澗是導耳
濟水於此又兼邲目春秋宣公十三年晉楚之戰楚
軍於邲即是水也音卞 全氏曰二字注中注京相璠曰在敖北
濟水又東逕滎陽縣北曹太祖與徐榮戰不利曹洪
授馬於此處也濟水又東南礫谿水注之水出滎陽
城西南李澤澤中有水即古馮池也地理志曰滎陽

縣馮池在西南是也東北流歷教山南春秋晉楚之戰設伏于教前謂是也逕號亭北池水又東北逕榮陽縣北斷山東北注于濟世謂之礫石澗即經所謂礫礫矣經云濟出其南非也濟水又東索水注之水出京縣西南嵩諸山與東關水同源分流即古旃然水也其水東北流器難之水注之山海經曰少陘之水器難之水出焉而北流注于侵水

一清按山海經作侵水郭璞曰

一作

即此水也其水北流逕金亭又北逕京縣故城

西入于旃然之水域故鄭邑也莊公以居弟段號京

城太叔祭仲曰京城過百雉國之害也

一清按傳文是都城此句

是祭仲泛言先王建侯之制故曰都城道元刪去今京不度句直改都城為京城也城北有壇

山置趙世家成侯二十年魏獻榮陽因為壇臺置

也沈氏曰史記魏獻榮椽趙因以為檀臺榮椽木材非地也檀臺是屋非岡也善長不知何以有此悞

考檀臺在襄國見于續漢志而榮陽乃韓地後之為榮陽圖經者因造為檀山以相附會益更繆矣其

水亂流北逕小索亭西京相璠曰京有小索亭世語

以為本索氏兄弟居此故號小索者也又為索水索

水又北逕大柵城東晉滎陽民張卓董邁等遭荒鳩

聚流離堡固名為大柵塢至太平真君年潁州刺史

崔白自虎牢移州治此

全氏曰按太平真君下脫闕年魏書地形志太平真君八

年滎陽省併屬縣則移治或在是年但是豫州非潁州也又東開廣舊城創制改

築馬太和十七年遷都洛邑省州置郡

全氏曰按胡三省曰太和

十九年罷北豫州置東中府非郡也郡固先州置亦非十七年索水又屈而西流與

梧桐澗水合水出西南梧桐谷東北流注于索斯水

亦時有通塞而不常流也索水又北屈東逕大索城

南春秋傳曰鄭子皮勞叔向於索氏即此城也晉地道志所謂京有大索小索亭漢書京索之間也索水又東逕虢亭南應劭曰滎陽故虢公國也今虢亭是矣司馬彪郡國志曰縣有緇亭俗謂之乎咷城全氏曰按乎咷六朝時曰平桃見魏書蓋緇脫其半為乎乎又變而為平而咷又轉而為桃也城內有大冢名管叔冢或亦謂之為號咷城非也蓋緇緇字相類字轉失實也風俗通曰俗說高祖與項羽戰於京索遁於薄中羽追求之時鳩止鳴其上追之者以為

必無人遂得脫及即位異此鳩故作鳩杖以扶老案
廣志楚鳩一名啾啾啼之名蓋因鳩以起日焉所
未詳也索水又東北流須水右入焉水近出京城東
北二里榆子溝亦曰柰榆溝也又或謂之為小索水
東北流木蓼溝水注之水上承京城南淵世謂之車
輪淵淵水東北流謂之木蓼溝又東北入于須水須
水又東北流於滎陽城西南北注索索水又東逕滎
陽縣故城南漢王之困滎陽也紀信曰臣詐降楚王

宜間出信乃乘王車出東門稱漢降楚楚軍稱萬歲
震動天地王與數十騎出西門得免楚圍羽見信大
怒遂亨之信冢在城西北三里故蔡伯喈述征賦曰
過漢祖之所隘弔紀信於滎陽其城跨倚岡原居山
之陽王莽立為祈隊備周六隊之制魏正始三年歲
在甲子被癸丑詔書割河南郡縣自鞏關以東創建
滎陽郡并戶二萬五千以南鄉筑陽鄉亭侯李勝字
公昭為郡守故原武典農校尉政有遺惠民為立祠

於城北五里號曰李君祠廟前有石蹠蹠上有石的
石的銘具存其畧曰百族欣戴咸推厥誠今猶祀禱
焉索水又東逕周苛冢北漢祖之出滎陽也令御史
大夫周苛守之項羽拔滎陽獲苛曰吾以公為上將
軍封三萬戶侯能盡節乎苛瞑目罵羽羽怒亨之索
水又東流北屈西轉北逕滎陽城東而北流注濟水
杜預曰旃然水出滎陽成臯縣東入汝春秋襄公十
八年楚伐鄭右師涉潁次于旃然即是水也濟渠水

斷汜溝唯承此始故云汜受旃然矣亦謂之鴻溝水
蓋因漢楚分王指水為斷故也郡國志曰滎陽有鴻
溝水是也蓋因城地而變名為川水之異目濟水又
東逕滎澤北故滎水所都也京相璠曰滎澤在滎陽
縣東南與濟隧合濟隧上承河水於卷縣北河南逕
卷縣故城東又南逕衡雍城西春秋左傳襄公十一
年諸侯伐鄭西濟於濟隧杜預闕其地而名之水也
京相璠曰鄭地也言濟水

一清按下有脫文

滎澤中北流至

垣雍西與出河之濟會南去新鄭百里斯蓋滎播河
濟往復逕通矣出河之濟即陰溝之上源也濟隧絕
焉故世亦或謂其故道為十字溝自于岑造八激隄
於河陰水脈徑斷故瀆難尋又南會于滎澤旃然水
既斷民謂其處為滎澤春秋衛侯及翟人戰於滎澤
而屠懿公宏演報命納肝處也全氏曰按杜預曰戰處當在河北非此滎
澤也又宣十二年楚潘党逐魏錡及滎澤即此矣有垂隴城濟瀆出其北春
秋文公三年晉士穀盟于垂隴者也京相璠曰垂隴

鄭地今滎陽東二十里有故垂隴城即此是也世謂之都尉城蓋滎陽典農都尉治故變垂隴之名矣瀆際又有沙城城左佩濟瀆竹書紀年梁惠成王九年王會鄭釐侯于巫沙者也瀆際有故城世謂之水城非也史記秦昭王三十二年魏冉攻魏走芒卯入北宅即故宅陽城也竹書紀年曰惠成王十三年王及鄭釐侯盟于巫沙以釋宅賜之圍歸釐于鄭者也竹書紀年晉出公六年齊鄭伐衛荀瑶城宅陽俗言水

城非矣濟水自澤東出即是始矣王隱曰河決為滎
濟水受焉故有濟堤矣為北濟也濟水又東南逕釐
城東春秋經書公會鄭伯于時來左傳所謂釐也京
相璠曰今滎陽縣東四十里有故釐城也濟水又合
黃水黃水發源京縣黃堆山東南流名祝龍泉泉勢
沸湧狀若巨鼎揚湯西南流謂之龍項口世謂之京
水也又屈而北注于濟魚水入焉水出石暗澗東北
流又北與潞潞水合水出西谿東流水上有連理樹

其樹柞櫟也南北對生凌空交合谿水歷二樹之間
東流注于魚水魚水又屈而西北注黃水黃水又北
逕高陽亭東又北至故市縣重泉水注之水出京城
西南少陁山東北流又北流逕高陽亭西東北流注
于黃水又東北逕故市縣故城南漢高帝六年封關
澤亦為侯國河南之屬縣也黃水又東北至滎澤南
分為二水一水北入滎澤下為船塘俗謂之郊城陂
東西四十里南北二十里竹書穆天子傳曰甲寅天

子浮于滎水乃秦廣樂是也一水東北流即黃雀溝
矣穆天子傳曰壬寅天子東至于雀梁者也又東北
與靖水枝津合二水之合為黃泉北流注于濟水

又東過陽武縣南

濟水又東南流入陽武縣北歷長城東南流蒗蕩渠
出焉濟水又東北流北濟也逕陽武縣故城南王莽
更名之曰陽桓矣又東為白馬淵淵東西二里南北
一百五十步泉流名為白馬溝又東逕房城北穆天

子傳曰天子里圃田之路東至于房疑即斯城也郭注以為趙郡房子也余謂穆王里鄭圃而郭以趙之房邑為疆更為非矣濟水又東逕封邱縣南又東逕大梁城北又東逕倉垣城又東逕小黃縣之故城北縣有黃亭俛濟又謂之曰黃溝縣故陽武之東黃鄉也故因水以名縣沛公起兵野戰喪皇妣于黃鄉天下平定乃使使者以梓宮招魂幽野於是丹蛇自水濯洗入于梓宮其浴處有遺髮焉故謚曰昭靈夫人

因作寢以寧神也濟水又東逕東昏縣故城北陽武縣之戶牖鄉矣漢丞相陳平家焉平少為社宰以善均內稱令民祠其社平有功於高祖封戶牖侯是後置東昏縣也王莽改曰東明矣濟水又東逕濟陽縣故城南故武父城也城在濟水之陽故以為名王莽改之曰濟前者也光武生濟陽宮光明照室即其處也東觀漢記曰光武以建平元年生於濟陽縣是歲有嘉禾生一莖九穗大於几禾縣界大熟因名曰秀

又東過封丘縣北

北小濟也自滎澤東逕滎陽卷縣之武脩亭南春秋

左傳成公十年鄭子然盟于脩澤者也鄭地矣杜預

曰卷東有武修亭

一清按方輿紀要原武縣有武修亭或以為修魚也秦紀惠文王後

七年韓魏燕齊率匈奴共攻秦秦使穰里疾與戰於修魚今本左傳成十年註作修武修武在河北漢屬河內郡卷在河南漢屬河南郡則此宜是武修亭而非修武縣板本為誤也故卷城在原武縣北七里

濟瀆又東逕原武縣故城南春秋之原圃也穆天子

傳曰祭父自圃鄭來謁天子夏庚午天子飲于滂上

乃遣祭父如圃鄭是也王莽之原桓矣濟瀆又東逕陽武縣故城北又東絕長城鄭築也案竹書紀年梁惠成王十二年龍賈率師築長城于西邊自亥谷以南鄭所城矣竹書云是梁惠成王十五年築也郡國志曰長城自卷逕陽武到密者是矣濟瀆又東逕酸棗縣之烏巢澤澤北有故市亭晉太康地記曰澤在酸棗之東南昔曹太祖納許攸之策破表紹運處也濟瀆又東逕封丘縣南燕縣之延鄉也其在春秋為

長丘焉應劭曰左傳宋敗狄于長丘獲長狄緣斯是

也漢高帝封翟盱

一清按此處有關文史漢表衍簡侯翟盱以十一年七月封衍地闕

酈氏以盱封在延鄉未知所據且其事古傳有明徵

矣地理志封丘縣注孟康曰春秋傳敗狄于長丘今

翟溝是考封丘縣志云翟溝者因翟母得名母墓在

縣西南溝當墓前為津渠所逕陳留風俗傳云漢高

祖與項羽戰敗于延鄉有翟母者免其難也又魯國

都記云封丘衛地之延鄉漢高祖與項羽戰敗遇翟

母免難之處後以延鄉為封丘縣以封翟母即此地

也然則封于延鄉者是翟母非翟盱也又按史漢表

侯功狀云盱以漢王二年為燕令又堅守燕

侯豈燕即衍聲音之轉字從而變未可知也 濮水出

焉濟瀆又東逕大梁城之赤亭北而東注

又東過平丘縣南

北濟也縣故衛地也春秋魯昭公十三年諸侯盟于平丘是也縣有臨濟亭田儋死處也又有曲濟亭皆

臨側濟水

又東過濟陽縣北

北濟也自武父城北闕駟曰在縣西北鄭邑也東逕濟陽縣故城北圜稱陳留風俗傳曰縣故宋地也竹書紀年梁惠成王三十年城濟陽漢景帝中六年封

梁孝王子明為濟川王應劭曰濟川今陳留濟陽縣是也

又東過冤胸

一清按漢志作冤
句師古曰音幼

縣南又東過定陶縣南

南濟也濟水自濟陽縣故城南東逕戎城北春秋隱

公二年公會戎于潛杜預曰陳留濟陽縣東南有戎

城是也濟水又東北荷水東出焉濟水又東北逕冤

胸縣故城南呂后元年封楚元王子劉執為侯國

朱氏

謀璋箋曰按漢表景帝封

王莽之濟平亭也濟水又東逕秦相魏

丹家南丹秦宣太后弟也代客卿壽燭為相封于穰
益封于陶號曰穰侯富于王室范雎說秦秦王悟其
擅權免相就封出關輜車千乘卒于陶而因葬焉世
謂之安平陵墓南崩碑尚存濟水又東北逕定陶恭
王陵南漢哀帝父也帝即位母丁太后建平二年崩
上曰宜起陵于恭皇之園送葬定陶貴震山東王莽
秉政貶號丁姬開其鄼戶火出炎四五丈吏卒以水
沃滅乃得入燒燔鄼中器物公卿遣子弟及諸生四

夷十餘萬人操持作具助將作掘平恭王母傅太后墳及丁姬冢二旬皆平恭又周棘其處以為世戒云時有羣鷺數千銜土投于丁姬窀中今其墳冢巍然尚秀隅阿相承列郭數周面開重開南門內夾道有崩碑二所世尚謂之丁昭儀墓又謂之長隧陵蓋所毀者傅太后陵耳丁姬墳墓事與書違不甚過毀未必一如史說也墳南魏郡治也世謂之左城亦名之曰葬城蓋恭王之陵寢也濟水又東北逕定陶縣故

城南側城東注也縣故三醜國也湯追桀伐三醜即此周武王封弟叔振鐸之邑故曹國也漢宣帝甘露二年更濟陰為定陶國王莽之濟平也戰國之世范蠡既雪會稽之恥乃變姓名寓之於陶為朱公以陶天下之中諸侯四通貨物之所交易也治產致千金富好行德子孫修業遂致巨萬故言富者皆曰陶朱公也

又屈從縣東北流

南濟也又東北右合河水瀆水上承濟水於濟陽縣東世謂之五丈溝又東逕陶丘北地理志曰禹貢定

陶西南有陶丘陶丘亭在南

一清按地理志濟陰郡定陶縣禹貢陶丘在西

南陶丘亭今注以禹貢二字冠定陶之上非是又陶丘亭下似今本漢書脫在南二字當以此文補之

墨子以為釜丘也竹書紀年魏襄王十九年薛侯來

會王于釜丘者也尚書所謂導菏水自陶丘北

一清按尚

書禹貢導沆水下是東出于陶丘北又東至于荷善長所引顛倒之矣

謂此也荷水東

北出於定陶縣北屈左合汜水汜水西分濟瀆東北

逕濟陰郡南爾雅曰濟別為澨呂忱曰水決復入為
汜廣異名也汜水又東合于荷瀆昔漢祖既定天下
即帝位於定陶汜水之陽張晏曰汜水在濟陰界取
其汜愛宏大而潤下也汜水之名於是乎在矣汜水
又東北逕定陶縣南又東北右合黃水枝渠渠上承
黃溝東北合荷而北注濟瀆也

水經注釋卷七

欽定四庫全書

水經注釋卷八

仁和趙一清撰

濟水二

濟水又東至乘氏縣西分為二

春秋左傳僖公三十一年分曹地東傳於濟濟水自是東北流出鉅澤

其一水東南流其一水從縣東北流入鉅野澤

南為荷水北為濟瀆逕棄氏縣與濮渠合

北濟自濟陽縣北東北逕煮棗城南郡國志曰冤胸

縣有煮棗城即此也漢高祖十二年封草朱為侯國

北濟又東北逕冤胸縣故城北又東北逕呂都縣故

城南王莽更名之曰祁都也又東北逕定陶縣故城

北漢景帝以濟水出其北東流中六年分梁於定陶

置濟陰郡

一清按濟陰郡當作濟陰國考漢書諸侯王表景帝以中六年封梁孝王子不識為

濟陰王始有濟陰之稱故地理志云濟陰郡故梁景帝六年別為濟陰國不識立二年而薨無後則是國

已除矣其時或仍屬于梁或立為郡志不之詳也又云宣帝甘露二年更名定陶是又為王國矣其時以封皇子蠶後徙王楚迨元帝永光八年徙皇子山陽王康為定陶王是為共王王子欣即哀帝既入繼大統立楚思王子景為定陶王奉共王後二年徙景王信都如淳曰不復為定陶王立後者哀帝自以已為後故哀帝崩無後徵立中山孝王之子衍為帝是為平帝其時王莽擅權與傅丁為仇之際定陶國之廢必在斯時故續志云濟陰郡治定陶劉昭補註惟以郡故梁景帝分置為言而其顛末亦不暇詳也獨怪班固既詳建國之始乃遺立郡之由不幾犯張冠李戴方鑿圓枘之誚也道元亦因仍書之誤矣

為一清按為字疑誤

濟而定名也又東北與濮水會上承濟

水於封丘縣即地理志所謂濮渠水首受濟者也闕

駟曰首受別濟即北濟也其故瀆自濟東北流左迤
為高粱陂方三里濮水又東迤匡城北孔子去衛適
陳遇難於匡者也又東北左會別濮水受河於酸棗
縣故杜預云濮水出酸棗縣首受河竹書紀年曰魏
襄王十年十月大霖雨疾風河水溢酸棗郭漢世塞
之故班固云文堙酸棗也今無水其故瀆東北迤南
北二棣城間左傳襄公五年楚子囊伐陳公會于城
棣以救之者也濮渠又東北迤酸棗縣故城南韓國

矣園稱曰昔天子建國名都或以令名或以山林故
豫章以樹氏郡酸棗以棘名邦故曰酸棗也漢官儀
曰舊河堤謁者居之城西有韓王望氣臺孫子荆故
臺賦叙曰酸棗寺門外夾道左右有兩故臺訪之國
老云韓王聽訟觀臺高一十仞雖樓榭泯滅然廣基
似於山岳召公大賢猶舍甘棠區區小國而臺觀隆
崇驕盈於世以鑒來今故作賦曰蔑丘陵之邇迤亞
五嶽之嵯峨言壯觀也城北韓之市地也聶政為濮

陽嚴仲子刺韓相俠累遂皮面而死其姊哭之於此

城內有後漢酸棗令劉孟陽碑

一清按孟陽名熊見趙明誠金石錄跋尾

濮水北稱成陂

一清按此處有脫誤

陂方五里號曰同池陂又

東逕胙亭東注故胙國也富辰所謂邢茅胙祭周公

之盾也濮渠又東北逕燕城南故南燕姑姓之國也

有北燕故以南氏縣東為陽清湖陂南北五里東西

三十里亦曰燕城湖逕桃城南即戰國策所謂酸棗

虛桃者也漢高帝十二年封劉襄為侯國

全氏曰孫汝澄云劉

襄所封之桃在信都道元于濁漳水篇已證之誤復于此而東注于濮俗謂之朝

平溝濮渠又東北又與酸水故瀆會酸瀆首受河於

酸棗縣東逕酸棗城北延津南謂之酸水竹書紀年

曰秦蕞胡率師伐鄭韓襄敗秦蕞胡于酸水者也酸

瀆水又東北逕燕城北又東逕滑臺城南又東南逕

瓦亭南春秋定公八年公會晉師于瓦魯尚執羔自

是會始也又東南會于濮世謂之百尺溝濮渠之側

有漆城竹書紀年梁惠成王十六年邯鄲伐衛取漆

富邛城之者也或亦謂之宛濮亭春秋甯武子與衛人盟于宛濮杜預曰長垣西南近濮水也京相璠曰衛地也似非闢究而不知其所竹書紀年梁惠成王五年公子景賈率師伐鄭韓明戰于陽我師敗逋澤北有壇陵亭亦或謂之大陵城非所究也又有桂城竹書紀年梁惠成王十七年齊田期伐我東鄙戰于桂陽我師敗逋亦曰桂陵案史記齊威王使田忌擊魏敗之桂陵齊於是彊自稱為王以令天下濮渠又

東逕蒲城北故衛之蒲邑孔子將之衛子路出迎於蒲者也韓子曰魯以仲夏起長溝子路為蒲宰以私粟饋衆孔子使子貢毀其器焉余案家語言仲由為蒲宰脩溝瀆與之簞食瓢飲夫子令賜止之無魯字全氏曰韓非子本言子路為邠宰故屬之魯道元既誤引而又贅辨之不然是俗本誤邠為蒲也又入其境三稱其善身為大夫終死衛難濮渠又東逕

韋城南即白馬縣之韋鄉也史遷記曰夏伯豕韋之故國矣城西出而不方城中有六大井皆隧道下俗

謂之江井也有馳道自城屬于長垣濮渠東絕馳道
東逕長垣故城北衛地也故首垣矣秦更從今名王
莽改為長固縣陳留風俗傳曰縣有防垣故縣氏之
孝安帝以建光元年封元舅宋俊為侯國縣有祭城
濮渠逕其北鄭大夫祭仲之邑也杜預曰陳留長垣
縣東北有祭城者也園稱又言長垣縣有羅亭故長
羅縣也漢封後將軍常惠為侯國地理志曰王莽更
長羅為惠澤後漢省并長垣有長羅澤即吳季英牧

猪處也又有長羅罡蘧伯玉罡陳留風俗傳曰長垣
縣有蘧伯鄉一名新鄉有蘧亭伯玉祠伯玉冢曹大
家東征賦曰到長垣之境界兮察農野之居民覩蒲
城之丘墟兮生荆棘之萋萋蘧氏在城之東南兮民
亦饗其丘墳唯令德之不朽兮身既沒而名存昔吳
季札聘上國至衛觀典府賓亭父疇以衛多君子也
朱氏謀璋箋曰左傳云延陵季子去鄭適衛說蘧伯
玉史狗史緇公子荆公子發公子朝此云觀典府賓
亭父疇
未詳 濮渠又東分為二瀆北濮出焉濮渠又東逕

須城北衛詩云思須與曹也毛云須衛邑矣鄭云自
衛而東逕邑故思濮渠又北逕襄丘亭南竹書紀年
曰襄王七年韓明率師伐襄丘九年楚庶章率師來
會我次于襄丘者也濮水又東逕濮陽縣故城南昔
師延為紂作靡靡之樂武王代紂師延東走自投濮
水而死矣後衛靈公將之晉而設舍于濮水之上夜
聞新聲召師涓受之於是水也濮水又東逕沛陰離
狐縣故城南王莽之所謂瑞狐也郡國志曰故屬東

郡濮水又東逕葭密縣故城北竹書紀年元公三年

魯季孫會晉幽公於楚丘取葭密遂城之

一清按此文本作幽

王十三年魯季孫會晉文公于楚丘即葭密遂城之
朱謀埠箋云幽王舊本作幽公十三年宋本無十字
今本竹書紀年周考王十四年魯季孫會晉幽公于
楚丘無即葭密遂城之六字寰宇記曹州垂氏縣下
云竹書紀年幽公十三年季孫會晉文公于楚取葭
密遂成之則知古本竹書如是然而有大可疑者史
記六國年表周考王元年歲辛丑十四年甲寅當魯
元公嘉之二年晉幽公柳之十年而魯世家注徐廣
曰皇甫謐云元公元年辛亥終辛未得二十一
年與世表參校差二歲此云三年又差一歲

濮水

又東北逕鹿城南郡國志曰濟陰乘氏縣有鹿城鄉

春秋僖公二十一年盟于鹿上京杜並謂此亭也濮水又東與句瀆會首受濮水枝渠於句陽縣東南逕句陽縣故城南春秋之穀邛也左傳以為句瀆之丘

矣縣處其陽故縣氏焉又東入乘氏縣左會濮水與

濟同入鉅野故地理志曰濮水自濮陽南入鉅野一清

按此是應劭說非班固元文亦經所謂濟水自乘氏縣兩分東北

入於鉅野也濟水故瀆又北右合洪水水上承鉅野薛訓渚歷澤西北又北逕闕鄉城西春秋桓公十有

一年經書公會宋公于闕郡國志曰東平陸有闕亭
皇覽曰蚩尤冢在東郡壽張縣闕鄉城中冢高七尺
常十月祠之有赤氣出如絳民名為蚩尤旗十三州

志曰壽張有蚩尤祠

漢志東郡壽良縣蚩尤祠西北沛上也

又北與濟

瀆合自渚迄于北口一百二十里名曰洪水桓温以
太和四年率衆北入掘渠通濟至義熙十三年劉武
帝西入長安又廣其功自洪口已上又謂之桓公瀆
濟自是北注也春秋莊公十八年經書夏公追戎於

濟西京相璠曰濟水自鉅野至濟北是也

又東北過壽張縣西界安民亭南汶水從東北來注之
濟水又北汶水注之戴延之所謂清口也郭緣生述
征記曰清河首受洪水北流入濟或謂清即濟也禹
貢濟東北會于汶今枯渠注巨澤巨濟北則清口清
水與汶會也李欽曰汶水出太山萊蕪縣西南入濟
是也濟水又北逕梁山東袁宏北征賦曰背梁山截
汶波即此處也劉澄之引是山以證梁父為不近情

矣山之西南有吕仲悌墓河東岸有石橋橋本當河
河移故側岸也古老言此橋東海吕母起兵所造也

山北三里有吕母宅宅東三里即濟水濟水又北逕

須朐城西城臨側濟水故須朐國風姓也春秋僖公

二十一年子魚曰

朱氏諱埜箋曰此三字宜刪一
清按三字是邴氏誤引傳文任

宿須朐顯史風姓也實司太皞與有濟之祀杜預曰

須朐在須昌縣西北非也地理志曰壽張縣西北有

朐城者是也濟水西有安民亭亭北對安民山東臨

濟水水東即無鹽縣界也山西有冀州刺史王紛碑

漢中平四年立

趙氏明誠金石錄跋尾曰冀州刺史王純碑延熹四年立桑欽水經云濟

水逕須句城西酈道元注濟水西安民山山西有冀州刺史王紛碑漢中平四年立按地理須句即今中都縣此碑在中都又其官與姓氏皆合疑其是也然以純為紛以延熹為中平則疑水經之誤葉氏奕苞續金石錄曰漢冀州刺史王純碑云君諱純字伯敷年五十九延熹四年八月廿八日甲寅隕殂五年十一月十八日丙申葬而立此碑也按水經王紛碑立于中平四年去延熹已二十餘年或別有王紛非王純也且隸書純紛二字絕不類而此碑純字完好更無殘泐若趙氏所云乃好奇之過君子于其所不知蓋闕如也濟水又北逕微鄉東春秋莊公二十八年經書

冬築郿京相璠曰公羊傳謂之微在東平壽張縣西
北三十里有故微鄉魯邑也杜預曰有微子冢濟水
又北分為二水其枝津西北出焉謂之馬頰水者也
又北過須昌縣西

京相璠曰須朐一國二城兩名蓋遷都須昌朐是其
本秦以為縣漢高帝十一年封趙衍為侯國濟水於
縣趙溝水注之濟水又北逕魚山東左合馬頰水水
首受濟西北流歷安民山北又西流趙溝出焉東北

注于濟馬頰水又逕桃城東春秋桓公十年經書公會衛侯于桃丘衛地也杜預曰濟北東阿縣東南有桃城即桃丘矣馬頰水又東北流逕魚山南山即吾山也漢武帝瓠子歌所謂吾山平者也山之上有利舒城魏東阿王曹子建每登之有終焉之志及其終也葬山西西去東阿城四十里其水又東注于濟謂之馬頰口也濟水自魚山北逕清亭東春秋隱公四年公及宋公遇于清者也京相璠曰今濟北東阿東

北四十里有故清亭即春秋所謂清者也是下濟水
通得清之目焉亦水色清深用兼厥稱矣是故燕王
曰吾聞齊有清濟濁河以為固即此水也

又北過穀城縣西

濟水側岸有尹邠壘南去魚山四十餘里是穀城縣
界故春秋之小穀城也齊桓公以魯莊公二十三年
城之邑管仲焉城內有夷吾井魏土地記曰縣有穀
城山山出文石陽穀之地春秋齊侯宋公會于陽穀

者也縣有黃山臺黃石公與張子房期處也又有狼

水出東南大檻山狼溪西北逕穀城西又北有西流

泉出城東近山西北逕穀城北西注狼水以其流西

故即名焉

趙東文滄水集雙溪記東平黃山之下曰浪溪鄰道元水經注所謂狼溪者是也狼

浪同聲因以名之浪溪東二十里而近有佛屋溪源于此築堰匯水為溪溪廣百畝上納天光下侵山根中植亭館蒔以花竹命之曰雲溪一清按雲溪似即注中所謂西流泉也又西北入清水

城西北三里有項王羽之冢半許毀壞石碣尚存題

云項王之墓皇覽云冢去縣十五里謬也今彭城穀

陽城西南又有項羽冢非也余按史遷記魯為楚守
漢王示羽首魯乃降遂以魯公禮葬羽於穀城寧得
言彼也濟水又北逕周首亭西春秋文公十有一年
左丘明云襄公二年王子成父獲長狄僑如弟榮如
埋其首於周首之北門即是邑也今世謂之盧子城
濟北郡治也京相璠曰今濟北所治盧子地故齊周
首邑也

又北過臨邑縣東

地理志曰縣有濟水祠也王莽之殺城亭也水有石門以石為之故濟水之門也春秋隱公三年齊鄭會于石門鄭東僨濟即於此也京相璠曰石門齊地今濟北盧縣故城西南六十里有故石門去水三百步蓋水瀆流移故側岸也濟水又北逕平陰城西春秋襄公十八年晉侯沈玉濟河會于魯濟尋溴梁之盟同伐齊齊侯禦諸平陰者也杜預曰城在盧縣故城東北非也京相璠曰平陰齊地也在濟北盧縣故城

西南十里平陰城南有長城東至海西至濟河道所
由名防門去平陰三里齊侯塹防門即此也其水引

濟故瀆尚存今防門北有光里齊人言廣音與光同

全氏曰八字注中注

即春秋所謂守之廣里者也

何氏曰杜氏以為防門之

塹其廣一里耳善長則以廣為里名全氏曰杜說是也

鄰以聲音之變為證非矣又云巫山

在平陰東北昔齊侯登望晉軍畏衆而歸師曠邢伯
聞烏烏之聲知齊師潛遊人物咸淪地理昭著賢於
杜氏東北之證矣今巫山之上石室耆老言郭巨

葬母處世謂之孝子堂濟水右迤為涓湖方四十餘里濟水又東北逕垣苗城西故洛當城也伏鞬北征記曰濟水又與清河合流至洛當者也宋武帝西征

長安令垣遵鎮此故俗人有垣苗之稱

一清按垣苗垣苗伯仲並

為劉武帝叅軍從征長安豈可兄鎮此城弟襲其號乎其一城亦未必二人居守而城有垣苗之稱則垣遵為誤引也又按通鑑宋紀孝武大明三年以義陽太守垣閻為兗州刺史閻遵之子也胡三省注曰垣遵即垣苗也武帝西征長安使遵守洛當城城據河濟之會人謂之垣苗城此是全襲鄴注之誤忘却晉書安帝義熙五年劉裕伐慕容超超尚書畧陽垣遵及弟京兆太守垣苗踰城來降之文遵乃苗之兄

不審梅磳向
以失檢乃爾
河水自四瀆口東北流而為清魏土地
記曰盟津河別流十里與清水合亂流而東逕洛當
城北黑白異流涇渭殊別而東流注也

又東北過盧縣北

濟水東北與涓溝合水上承涓湖北流注濟爾雅曰
水草交曰涓通谷者微捷為舍人曰水中有草木交
合也郭景純曰微水邊通谷也釋名涓眉也臨水如
眉臨目也
一清按魏書慕容白曜傳作
涓溝即涓溝矣音同通用
濟水又逕盧

縣故城北濟北郡治也漢和帝永元二年分泰山置
蓋以濟水在北故也濟水又逕什城北城際水湄故
邸閣也祝阿人孫什將家居之以避時難因謂之什
城焉濟水又東北與中川水合水東南出山荏縣之
分水嶺溪一源兩分泉流半解亦謂之分流交半水
南出大山入汶半水出山荏縣西北流逕東太原郡
南郡治山荏西北與賓溪谷水合水出南格馬山賓
溪谷北逕盧縣故城北陳敦戍南西北流與中川水

合謂之格馬口其水又北逕廬縣故城東而北流入
濟俗謂之為沙溝水濟水又東北右會玉水水導源
太山朗公谷舊名琨瑞溪有沙門竺僧朗少事佛圖
澄碩學淵通尤明氣緯隱于此谷因謂之朗公谷故
車頻秦書云苻堅時沙門竺僧朗嘗從隱士張巨和
遊巨和嘗穴居而朗居琨瑞山大起殿舍連樓累閣
雖素飾不同並以靜外致稱即此谷也水亦謂之琨
瑞水也其水西北流逕玉符山又曰玉水又西北逕

獵山東又西北枕祝阿縣故城東野井亭西春秋昭

公二十五年經書齊侯唁公于野井是也春秋襄公

十九年諸侯盟于祝柯左傳所謂督陽者也漢興改

之曰阿矣漢高帝十一年封高邑為侯國王莽之安

成者也故俗謂是水為祝阿澗水北流注于濟建武

五年耿弇東擊張步從朝陽橋濟渡兵

一清按後漢書耿弇傳東

從朝陽橋河以度章懷註云朝城在濟水此有漯河鄭氏以濟渡連稱詞義舛舛

即是處也

濟水又東北漯水出焉漯水出歷城縣故城西南泉

源上奮水涌若輪春秋桓公十八年公會齊侯于濼是也俗謂之為娥姜水也以泉源有舜妃娥英廟故也城南對山山上有舜祠山下有大穴謂之舜井抑亦茅山禹井之比矣書舜耕歷山亦云在此所未詳也其水北為大明湖西即大明寺寺東北兩面側湖此水便成淨池也池上有客亭左右楸桐負日俯仰目對魚鳥極水木明瑟可謂濠梁之性物我無違矣湖水引瀆東入西郭東至歷城西而側城北注湖水

上承東城歷祠下泉源競發其水北流逕歷城東又北引水為流杯池州僚賓燕公私多萃其上分為二水右水北出左水西經歷城北西北為陂謂之歷水與灤水枝津合水首受歷水於歷城東東北逕東城西而北出郭又北注灤水又北聽水出焉灤水又北流注于濟謂之灤口也濟水又東北逕華不注山單椒秀澤不連邳陵以自高虎牙桀立孤峰特拔以刺天青崖翠發望同點黛山下有華泉故京相璠春秋

土地名曰華泉華不注山下泉水也春秋左傳成公
二年齊頃公與晉卻克戰于鞏齊師敗績逐之三周
華不注逢丑父與公易位將及華泉驂絰於木而止
丑父使公下如華泉取飲齊侯以免韓厥獻丑父卻
子將戮之呼曰自今無有代其君任患者有一於此
將為戮矣卻子曰人不難以死免其君我戮之不祥
赦之以勸事君者乃免之即華水也北絕聽瀆二十
里注于濟

又東北過臺縣北

巨合水南出鷄山西北北逕巨合故城西耿弇之討張步也守巨里即此城也三面有城西有深坑坑西即弇所營也與費邑戰斬邑于此巨合水又北合關盧水關盧水導源馬耳山北逕博亭城西北流至平陵城與武原水合水出譚城南平澤中世謂之武原泉北逕譚城東俗謂之古城也又北逕東平陵縣故城西故陵城也後乃加平譚國也齊桓之出過譚

譚不禮焉魯莊公九年即位又不朝十年滅之城東

門外有樂安任照先碑

一清按名勝志引此注云城東有漢相劉衡碑又有樂安

任照先碑今本無劉衡碑之目盖有脫失矣

濟南郡治也漢文帝十六年

置為王國景帝二年為郡王莽更名樂安其水又北

逕巨合城東漢武帝以封城陽頃王子劉發于為侯

國沈氏曰史漢表俱無于字又按漢表云平原索隱亦云皆為誤也後漢書章懷註云巨里聚一名巨

合城在齊州全節縣東南全節唐改即漢東平陵也其水合關盧水西出注巨

合水西北逕臺縣故城南漢高帝六年封東郡尉戴

野為侯國王莽之臺治也

一清按高祖功臣表臺定侯戴野日知錄漢書濟南

郡之縣十四一曰東平陵二曰鄒平三曰臺四曰梁鄒後漢書濟南郡十城其一曰東平陵其四曰臺其

七曰梁鄒其八曰鄒平後人讀漢書誤從鄒字絕句因以鄒為一縣平臺為一縣齊乘遂謂漢濟南郡後

漢改為鄒平又以臺平臺為二縣此不得其句讀而妄為之說也漢志常山郡有平臺縣是史子叔封邑

亭林之說也其水西北流白野泉水注之水出臺城西南

白野泉北逕留山西北流而右注巨合水又北聽水

注之水上承灤水東流北屈又東北流注于巨合水

亂流又北入于濟濟水又東北合芹溝水水出臺縣

故城東南西北流逕臺城東又西北入于濟水

又東北過管縣南

濟水東逕管縣故城南漢景帝二年封齊悼惠王子

罷軍為侯國

全氏曰于欽云管史漢表皆誤作管故索隱以為滎陽又表是文帝四年封

右納百脈水百脈水出土鼓縣故城西水源方百步
百泉俱出故謂之百脈水其水西北流逕陽丘縣故

城中漢孝景帝四年以封齊悼惠王子劉安為陽丘

侯一清按漢表楊丘侯安以文帝四年封而史表無之史表有瓜丘侯寧國索隱曰縣在魏郡地理志

魏郡無瓜丘則斥邛之誤也漢表云氏丘侯甯國氏丘亦斥丘之譌又按氏丘侯封十一年而薨十五年侯偃嗣十年為景帝三年反誅楊丘侯封十二年而薨十六年侯偃嗣十一年為景帝四年坐出國界耐為司寇嗣侯名為偃其封薨與嗣摠差一年一似氏丘之即楊丘者未知史表脫一人也抑漢表多一人也世謂之章丘城非也城南有女郎山山上有神祠

俗謂之女郎祠左右民祀焉其水西北出城北逕黃巾固蓋賊所屯故固得名焉百脈水又東北流注于濟濟水東又有楊渚溝水水出逢陵故城西南二十里逕土鼓城東又西北逕章丘城東又北逕寧戚城

西北流注于濟水也

又東過梁鄒縣北

隴水南出長城中北流至般陽縣故城西南與般水
會水出縣東南龍山俗亦謂之為左阜水西北逕其
城南王莽之濟南亭也應劭曰縣在般水之陽縣資
名焉其水又南屈西入隴水北逕其縣西北流至萌
水口萌水出西南甲山東北逕萌山西東北入于隴
隴水又西北至梁鄒東南與魚子溝水合水南出長

白山東柳泉口山即陳仲子夫妻之所隱也孟子曰

仲子齊國之世家兄戴祿萬鍾仲子非而不食避兄

離母家于於陵即此處也其水又逕於陵縣故城西

王莽之于陸也世祖建武十五年更封則鄉侯侯霸

為侯國

一清按後漢書侯霸傳建武十三年薨帝親自臨弔下詔追封謚則鄉哀侯何緣有十五

年更封之事本傳又云子昱嗣昱後徙封於陵侯是霸之子非霸也善長誤矣其水北流注

于隴水隴水即古袁水也故京相璠曰濟南梁鄒縣

有袁水者也隴水又西北逕梁鄒縣故城南又北屈

逕其城西漢高祖六年封武虎為侯國

一清按史表作武儒此從

漢表其水北注濟其城之東北又有時水西北注焉

又東北過臨濟縣南

縣故狄邑也王莽更名利居漢記安帝永初二年改從今名以臨濟故地理風俗記云古樂安太守治晏

謨齊記曰有南北二城隔濟水南城即被陽縣之故

城也北枕濟水地理志曰侯國也如淳曰音罷軍之

罷也

一清按漢志注如淳曰一作疲史表作披索隱曰蕭該披音皮劉氏音皮彼反史記建

元以來王子侯者年表曰漢武帝元朔四年封齊孝
王子敬侯劉燕之國也今渤海僑郡治濟水又東北
迤為淵渚謂之平州坳濕沃縣側有平安故城俗謂

之會城非也

一清按 渚水注云伏琛曰千乘城在齊
城西北一百五十里隔會水即渚水之

別名故渚沃縣側之城
俗謂之會城也以此

按地理志千乘郡有平安縣

侯國也

全氏曰地理志有此語而侯表中無以平安
封者蓋失之一清按孝成許皇后傳后姪子

平安剛侯謁則是平安之封
邑可知但侯表中無之耳

王莽曰鴻睦也應劭曰

博昌縣西南三十里有平安亭故縣也世尚存平州

之名矣濟水又東北逕高昌縣故城西案地理志曰
千乘郡有高昌縣漢宣帝地節四年封董忠為侯國
世謂之馬昌城非也濟水又東北逕樂安縣故城南
伏琛齊記曰博昌城西北五十里有南北二城相去
三十里隔時濟二水指此為博昌北城非也樂安與
博昌薄姑分水俱同西北薄姑去齊城六十里樂安
越水差遠驗非尤明班固曰千乘郡有樂安縣應劭
曰取休令之名矣漢武帝元朔五年封李蔡為侯國

全氏曰按漢表李蔡封安樂是瑯琊之昌縣非千乘之安樂也史表作樂安而索隱曰表在昌可証也一清按全說非也李蔡封樂安侯史漢李廣傳功臣表衛青傳及百官公卿表凡七見惟漢書功臣表作安樂耳故師古以表為誤蓋封在樂安而食邑于昌亦或是博昌與樂安同屬千乘并非瑯琊之昌轉寫者脫失耳禹貢錐指曰樂安故城在今博興縣東隋改樂安曰博昌五代唐曰博興元和志博昌縣清水在北去縣百步按此經舊在高昌下今據薄姑利縣俱南直臨淄而樂安故城在博昌縣東北則此經乃錯簡故移于利縣之後甲下邑之前一清按東樵不知此條是注所謂先經起事乃有錯簡之疑即實非也今仍城西三里有任光冢先是宛縣人不得為博

昌明矣濟水又逕薄城北後漢郡國志曰博昌縣有

薄姑城地理書曰呂尚封于齊郡薄姑薄姑故城在臨淄縣西北五十里近濟水史遷曰胡公徙薄姑清一

按史記齊世家是獻公內有高臺春秋昭公二十年齊景公飲

于臺上曰古而不死何樂如之晏平仲對曰昔爽鳩氏始居之季荊因之有逢伯陵因之薄姑氏又因之而後太公又因之臣以為古若不死爽鳩氏之樂非君之樂即于是臺也濟水又東北逕狼牙固西而東北流也

又東北過利縣西

地理志曰齊郡有利縣王莽之利治也晏謨曰縣在齊城北五十里

又東北過甲下邑入于河

濟水東北至甲下邑南東歷琅槐縣故城北地理風俗記曰博昌東北八十里有琅槐鄉故縣也山海經曰濟水絕鉅野注渤海入齊琅槐東北者也又東北河水枝津注之水經以為入河非也斯乃河水注濟

非濟入河

又東北入海

郭景純曰濟自滎陽至樂安博昌入海今河竭濟水而流不絕經言入河二說並失然河水于濟漯之北別流注海今所綴流者惟漯水耳郭或以為濟注之事實非也尋經脈水不如山經之為密矣

其一水東流者過桑氏縣南

河水分濟於定陶東北

一清按漢志濟陰郡下云禹貢荷澤在定陶東傳寅尚書

集解云許氏說文沂水出山陽湖陵南正與孔傳同而班固以為在定陶何也蓋在定陶者其澤也在湖陵者其流也其流與泗合正在單州之魚臺魚臺在單州東北百里而近正古湖陵地也而孟豬在睢陽東北則所謂被孟豬者導沂流之在定陶魚臺間者以被之于南也

東南右合黃溝枝流俗謂之界溝也北逕已氏縣故城西又北逕景山

東衛詩所謂景山與京者也毛公曰景山大山也全氏

曰按此非衛詩之景山歐陽志輿地廣記曰今拱州楚丘非衛之所遷縣有景山京岡皆後人附會又

北逕楚丘城西郡國志曰成武縣有楚丘亭杜預云

楚丘在成武縣西南衛懿公為狄所滅衛文公東徙

渡河野處曹邑齊桓公城楚丘以遷之故春秋稱邢

遷如歸衛國也即詩所謂升彼墟矣以望楚矣望

楚與堂景山與京故鄭元言觀其傍邑及山川也

程氏

公說春秋分記曰戎州已氏邑在今拱州楚丘縣戎
蓋昆吾之後別在夷狄周衰入于此天王使凡伯聘
魯由雒邑道楚丘至仙源逮其歸戎乃要而伐之楚
丘在河南宜為周魯往來之地以其逼近宋都故在
二漢晉屬梁國柱誤以此為即僖二年衛所城之邑
於隱七年釋云在濟陰城武縣於僖二年城楚丘則
釋云衛邑是以城楚丘為前日戎伐王使之楚丘矣
水經亦以戎伐凡伯于楚丘為衛文公徙居于此按
濟陰城武縣即今開德之衛南蓋隋大業初改從此
名謂梁郡有楚丘縣故以別之衛為狄所滅東徙渡

河野處曹邑文公徙居楚丘曹邑在今滑之白馬衛
南為近二邑不出邦域之中斯文公所由徙也又衛
南之楚丘在河北凡伯安有踰河北道衛南而使于
魯耶故衛南之楚丘為衛所域之邑而拱州之楚丘
則戎州已氏邑云顧氏炎武曰知錄曰春秋隱公七
年戎伐凡伯于楚丘以歸杜氏曰楚丘衛地在濟陰
城武縣西南夫濟陰之城武此曹地也而言衛非也
蓋與僖公二年城楚丘同名而誤按衛國之封本在
汲郡朝歌懿公為狄所滅渡河而東立戴公以廬于
曹杜氏曰曹衛下邑詩所謂思須與曹廬者無城郭
之稱而非曹國之曹也僖公二年城楚丘杜氏曰楚
丘衛邑詩所謂作于楚宮而非戎伐凡伯之楚丘也
但云衛邑而不詳其地然必在滑縣開州之間滑在
河東故唐人有魏滑分河之錄矣水經注乃曰楚丘
在成武西南即衛文公所徙誤矣彼曹國之地齊桓
安得取之而封衛乎以曹名同楚丘之名又同遂為

一爾一清按亭林之見與克齋合前輩立說大氏必
有依仿克齋遽于春秋之學本史記體制撰分記九
十卷疆理書尤稱詳覈然謂濟陰城武縣即開德之
衛南誤也濟陰郡宋時為曹州地方輿紀要云曹州
曹縣東南四十里有楚丘城春秋時戎州已氏之邑
左傳隱公七年戎伐凡伯于楚丘又襄公十年宋享
晉侯于楚丘蓋在曹宋間漢置已氏縣屬梁國是即
杜氏所云在濟陰城武縣者也楚丘在漢為已氏縣
屬梁國後漢屬濟陰郡隋屬梁郡開皇六年改從今
名唐屬宋州宋建州為應天府號南京楚丘縣隸焉
拱州崇寧四年建于開封府襄邑縣領縣二襄邑拓
城克齋云今拱州楚丘蓋當日曾以楚丘屬也迨元
始屬曹州明初省入曹縣衛南屬滑州後改隸澶州
文獻通考云崇寧四年建州為北輔五年升為開德
府太平寰宇記澶州衛南縣下云衛文公自曹邑遷
楚丘即此城也漢為濮陽縣地隋開皇十六年于此

置楚丘縣後以曹州有楚丘縣改名衛南此在衛之南垂故以名縣又云楚丘城在縣西北四里詩云定之方中作于楚宮城冢記云齊桓築楚丘之城即此也是即亭林所謂不詳其地必在滑縣開州之間者也兩地懸殊何乃混而為一乎杜註于隱七年戎伐凡伯之邑釋曰衛地在濟陰城武縣西南于僖二年所城則曰衛邑本自不錯惟于戎伐下多衛地二字為不合耳然鄆氏之說亦本漢志山陽郡成武縣下云有楚丘亭齊桓公所城遷衛文公于此子成公徙濮陽東郡濮陽縣下云衛成公自楚丘徙此故帝丘顛項墟蓋薦信班固而不暇詳審爾泗水篇注云又東逕山陽郡城武縣之楚丘亭北而不別具一語以釋之于瓠子水篇濮陽西南十五里之鉅丘亭以沮楚同音以為楚丘非也了之合而觀之真可謂滑突矣

又東北逕成武城西又東北逕郟城東疑郟徙也

所未詳矣全氏曰卽是魯邑如又東北逕梁丘城西

何徙此蓋郛城之誤

地理志曰昌邑縣有梁丘鄉春秋莊公三十二年宋

人齊人會于梁丘者也

朱氏謀璋箋曰孫汝登云按春秋宋公齊侯遇于梁丘

杜預曰高平昌邑縣西南有梁丘鄉又東北于乘氏

縣西而北注河水河水又東南逕乘氏縣故城南縣

即春秋之乘丘也故地理風俗記曰濟陰乘氏縣故

宋乘丘邑也

全氏曰乘丘非乘氏乘氏非宋地乃魯也一清按地理志濟陰郡乘氏縣師古

引應劭曰春秋敗宋師于乘丘此鄆亭之所本漢孝景中五年封梁孝王子

買為侯國也地理志曰乘氏縣泗水東南至睢陵入淮郡國志曰乘氏有泗水此乃荷澤也尚書有導荷澤之說自陶丘北東至于荷水無泗水之文又曰導荷澤被孟豬孟豬在睢陽縣之東北闕駟十三州記曰不言入而言被者明不常入也水盛方乃覆被矣澤水淼漫俱鍾睢泗故誌有睢陵入淮之言以通芑泗名矣然諸水注泗者多不止此可以終歸泗水便得擅通稱也或更有泗水亦可是水之兼其目所未

詳也

又東過昌邑縣北

河水又東逕昌邑縣故城北地理志曰縣故梁也漢

景帝中六年分梁為山陽國漢武帝天漢四年更為

昌邑國以封昌邑王賀

一清按諸侯王表天漢四年封者是哀王髡亦見武五子

傳乃賀之父賀廢國除以為山陽郡王莽之鉅野郡也道元誤矣

也後更為高平郡

一清按晉志高平國晉初分山陽置宋志云晉武帝泰始元年更名

後漢沈州治縣令王審懷金謁東萊太守楊震震不

受是其慎四知處也大城東北有金城城內有沈州
刺史河東薛季像碑以郎中拜剡令甘露降園熹平
四年遷州明年甘露復降殿前樹從事馮巡主簿華
操等相與褒樹表勒崇政次西有沈州刺史茂陵楊
叔恭碑從事孫光等以建寧四年立西北有東太山
成人班孟堅碑建和十年尚書右丞拜沈州刺史從
事秦閏等刊石頌德政碑咸列焉

又東過金鄉縣南

郡國志曰山陽有金鄉縣荷水逕其故城南世謂之

故縣城北有金鄉山也

一清按郡國志山陽郡金鄉縣劉昭補註引晉道記曰縣

多山所治名金山鑿而得金故名今注云金鄉縣蓋以山得名

又東過東緡縣北

濟水又東逕漢平狄將軍扶溝侯淮陽朱顯冢墓北
有石廟濟水又東逕東緡縣故城北故宋地春秋僖

公二十三年齊侯伐宋圍緡十三州記曰山陽有東
緡縣鄒衍曰余登緡城以望宋都者也後漢世祖建

武十一年封馮異長子璋為侯國也

又東過方與縣北為菏水

濟水東逕重鄉城南左傳所謂臧文仲宿于重館者也
也菏水又東逕武棠亭北公羊以為濟上邑也城有高臺二丈許其下臨水昔魯侯觀魚於棠謂此也在方與縣故城北十里經所謂菏水也菏水又東逕泥母亭北春秋左傳僖公七年秋盟于甯母謀伐鄭也
菏水又東與鉅野黃水合菏澤別名也黃水上承鉅

澤諸陂澤有濛澱育陂黃湖水東流謂之黃水又有
薛訓渚水自渚歷薛村前分為二流一水東注黃水
一水西北入澤即洪水也黃水東南流水南有漢荆

州刺史李剛墓剛字叔毅山陽高平人熹平元年卒

見其碑有石闕祠堂石室三間椽架高丈餘鏤石作

椽瓦屋施平天造方井側荷梁柱四辟隱起雕刻為

君臣官屬龜龍麟鳳之文飛禽走獸之像作制工嚴

不甚傷毀

洪氏造隸圖曰右荆州刺史李剛石室殘
畫象一軸高不及尺長一丈有半所圖車

馬之上橫刻數字云君為荊州刺史時前後導有騶
騎有步卒標榜皆湮沒在後一車碑失其半止存東
郡二字向前一車車前有榜惟郡太守三字可認前
後亦有騶騎步卒及沒字榜又一車僅存馬足泰半
無碑少前六騎形狀結束胡人也其上亦刻數字惟
烏桓二字可認漢長水校尉主烏桓騎又有護烏桓
校尉此以烏桓為尊騎必二校中李君嘗歷其一所
圖列女傳三事其一三人車一馬一無蓋醜女齊宣
王侍郎凡三榜車前一榜無字其一四人三榜惟梁
高行梁使者二榜有字此二列女武梁碑中亦有之
其一四人樊姬楚莊王孫叔敖鄭女允四榜後有一
榜而闕其人子聞閔人李丙仲南得此碑于西州馮
方圓仲宛轉假借書欲絕筆而得之鄰氏所載古碑
百餘惟李剛魯峻二墓有圖畫趙氏雖云曾得魯君
畫象而碑錄中無其目此碑自來好古之士未之見
也隸釋所有僅七種除武梁之外餘碑他無別本數

十年後紙敝墨渝就古之士撫
卷太息亦猶今之閱水經也

黃水又東逕鉅野縣

北何承天曰鉅野湖澤廣大南通洙泗北連清濟舊
縣故城正在澤中故欲置戍於此城城之所在則鉅
野澤也衍東北出為大野矣昔西狩獲麟於是處也
皇覽曰山陽鉅野縣有肩髀冢重聚大小與闕冢等
傳言蚩尤與黃帝戰剋之於涿廬之野身體異處故
別葬焉黃水又東逕咸亭北春秋桓公七年經書焚
咸邛者也水南有金鄉山縣之界界也金鄉數山皆

空中穴口謂之隧也戴延之西征記曰焦氏山北數

里有漢司隸校尉魯恭冢

一清按魯恭當作魯峻其墓碑云君諱峻字仲嚴山

陽昌邑人金石錄跋尾云魯峻碑其他地理書如方輿志寰宇記之類皆作峻惟水經誤轉寫為恭隸釋

曰漢故司隸校尉忠惠父魯君碑在濟州任城縣魯君名峻歷郎中謁者河內丞侍御史頓丘令九江守

議郎太尉長史御史中丞司隸校尉遭母憂自乞拜議郎服竟還拜屯騎校尉靈帝熹平元年卒明年葬

門生丁直等三百二十人謚之曰忠惠其子嚴立石作銘水經亦載此碑但誤以為名恭爾按廩注止言

魯家及石祠石廟而穿山得白蛇白兔不葬更葬山不言有碑也詳見下

南鑿而得金故曰金山山形峻峭冢前有石祠石廟

四辟皆青石隱起自書契以來忠臣孝子貞婦孔子
及弟子七十二人形像像邊皆刻石記之文字分明
隸圖魯峻石辟殘畫像錄曰右二石並廣三尺崇二
尺此石上下三橫首行一榜云祠南郊從大駕出時
次有大車帳下騎鮮明小史騎凡十六榜大車之上
一榜三字上兩字畧有左畔偏傍似是校尉騎字車
前兩旁鮮明八騎步于中者四人一榜鈴下二字三
十餘騎如魚鱗然列兩行橫車之後有駙馬二匹榜
曰持駙馬又帳下一騎小史持幢四騎次橫榜曰薦
士一人有榜秦曹書佐主簿車各一榜有車馬又騎
史僕射二騎鈴下二騎各有榜第三橫冠劍接武十
有五人人一榜蓋闕里之先賢也字而不名次石上
橫兩榜云君為九江太守時車前導者八人後騎石
損其半少前一榜云功曹史導有車馬車前二騎其

榜湮滅中橫但刻雲氣下橫十有六人形象標榜與
前石同後漢志大駕鹵簿五校在前按魯峻碑嘗歷
九江太守終于屯騎校尉從駕南郊乃屯騎之職藏
此者不知為何人碑既有九江標榜又有屯騎職掌
更有先賢形象定為魯峻石壁所刻其誰曰不然考
孔子家語史記七十子傳却子欽名吳梁子魚名鱣
商子木名瞿左子行名郢縣子期名成樊子遲名須
顏子柳名辛冉子產名季顏子路名無繇子其者
叔仲會也史作子期子魯者姓冉名孺子象者姓縣
名亶子景伯者子服何也唐劉懷玉作孔聖真宗錄
以子服景伯在七十子之間求子斂者疑是漆雕哆
地皇侯鉦書七作來韓勅碑書漆作漆漆雕哆字子
斂恐此求字是漆之省文縣子期史作子祺姓駟者
恐是壤駟赤子偃恐是言游如顏子思襄子魯襄子
思數人姓氏分明與史家異同字二家不能次以為
兩魯張史記作申棠家語作申績檀弓以申詳為顛

孫子張之^字二地音聲如此則傳聞異辭無足疑者
又二石長過于前其一之上橫畫圓人物如武梁畫
象主坐容拜侍于前後者六人又主容三人列坐侍
者四人中橫三車如雍邛令畫一車導騎二一車兩
人在前一車一人在後屋下之人三五賓主三車有
標榜皆湮滅一橫十有七人如前石所圖聖門高弟
人亦一榜一字不可認其一則上橫七騎皆右馳中
橫二車一有一導騎一則倍之未有五人在屋下二
穉子在屋上下橫兩輶車皆駕以一馬又一車有導
騎二未有五人在屋下立車皆有榜惟四導騎者上
下各一字粗可認上曰君下曰即魯君再為議郎豈
謂是乎以其冠劍人物絕類九江石壁所畫疑此二
石亦是魯祠四壁者汪聖錫家有此碑後漢志列侯
會耕祠導從中鮮明卒米氏畫史朱浮墓石壁人物
有鮮明數隊或者不能細認先賢姓氏但見
有鮮明數隊遂謂是朱浮墓畫象非也

長八尺磨瑩鮮明叩之聲聞遠近時太尉從事中郎
傅珍之諮議參軍周安穆折敗石牀各取去為魯氏
之後所訟二人並免官焦氏山東即金鄉山也有冢
謂之秦王陵山上二百步得冢口塹深十丈兩壁峻
峭廣二丈入行七十步得埏門門外左右皆有空可
容五六十人謂之白馬空埏門內二丈得外堂外堂
之後又得內堂觀者皆執燭而行雖無他雕鏤然治
石甚精或云是漢昌邑哀王冢所未詳也東南有范

巨卿冢石柱猶存巨卿名式山陽之金鄉人漢荊州

刺史與汝南張劭長沙陳平子石交號為死友矣清

隸釋云故廬江太守范府君之碑在濟州任城魏明帝青龍三年縣長薛君鄉人翟循等所立也黃

水又東南逕任城郡之亢父縣故城西夏后氏之任

國也漢章帝元和元年別為任城在北一清按續志任城國劉昭

補註云章帝元和元年分東平為任城王莽之延就亭也縣有詩亭春

秋之詩國也王莽更之曰順父矣地理志東平屬縣

也世祖建武二年封劉隆為侯國其中謂之桓公溝

南至方與縣入于沂水沂水又東逕秦梁夾岸積石
一里高二丈言秦始皇東巡所造固以名焉

沂水又東過湖陸縣南東入于泗水

澤水所鍾也尚書曰浮于淮泗達于河是也

一清按達于河

之河當依說文改作荷字黃公紹韻會舉要曰荷或作荷余按舊注尚書導荷澤被孟豬集韻亦作荷案淮泗入河必導于汴世謂汴是隋煬帝始通而疑禹貢有浮于淮泗達于河之文說者牽合傳會或指鴻溝引河水入泗安知非禹之迹或謂當時必有可達之理蔡氏書傳亦莫知所析衷今案說文荷字音柯注引禹貢浮于淮泗達于荷與導荷澤同則是達于荷非達于河也許慎所見蓋古文尚書後人傳寫之

誤不知从艸例以禹貢上下文達于河為句改荷為
河陸德明又以河音如字遂啟後人淮泗不能達河
之疑然陸氏于荷澤下注徐音柯又工可切於浮于
淮泗達于河下亦注云說文作荷工可切水出山陽
湖陵南則非九河之河明矣如字之音陸氏誤也近
世惟新安王氏曰濟入河溢為滎會于荷注于泗則
河為荷蓋明矣新安王氏是王炎晦叔尚書全解古
文尚書疏證曰按浮于淮泗達于荷今本作河二孔
無傳疏止陸德明引說文作荷余考之荷字是也蓋
荷者澤名為濟水所經又東至于荷者是在豫之東
北即徐之西北舟則自淮而泗自泗而荷然後由荷
入濟以達于河北徐之貢道也或曰曷不詳言之余
曰以上文兗州浮于濟澤達于河次青州便浮于汶
達于濟不復言達于河矣又次徐州浮于淮泗達于
荷亦不復言達于濟矣至揚州則沿于江海達于淮
泗且不復言達于荷矣不復言者蒙上文也一層脫

卸一層雖由當日水道之自然而其叙法從變字法從簡真屬聖經之筆直言達于河不識其何途之從惟言達于荷而水道歷歷然在目一字之長有助不小禹貢雖指曰青承兗曰達于濟則由濟入溧可知矣徐承青曰達于荷則由荷入濟可知矣揚承徐曰達于淮泗則由淮入泗由泗入荷可知矣淮通泗泗通荷荷通濟濟通河四州之貢道無不由濟者蓋闢以順推胡以逆沂可互相發明也雖指又曰漢志山陽郡湖陵縣下云禹貢浮于淮泗達于河水在南漢時湖陵縣安得有黃河此河字明係荷字之誤水在南謂荷水在南也酈道元泗水注引此文云荷水在南水經濟水篇言荷水過湖陸縣南東入泗皆確證不獨許慎說東觀漢記曰蘇茂殺淮揚太守得其郡文作荷也

營廣樂大司馬吳漢圍茂茂將其精兵突至湖陸與

劉永相會濟陰山陽濟兵於此處也

又東南過沛縣東北

濟與泗亂故沛納兩稱矣東觀漢記安平侯蓋延傳
曰延為虎牙大將軍與戰永軍反走潏水者半復與
戰連破之遂平沛楚臨淮志降延令沛修高祖廟置
嗇夫祝宰樂人因齋戒祠高廟也

又東南過留縣北

留縣故城翼佩泗濟宋邑也春秋左傳所謂侵宋呂

留也故繁休伯避地賦曰朝余發乎泗洲夕余宿于留鄉者也張良委身漢祖始自此矣終亦取封焉城內有張良廟也

又東過彭城縣北獲水從西來注之

濟水又南逕彭城縣之故城東北隅不東過也獲水自西注之城北枕水湄濟水又南逕彭城縣故城東不逕其縣北也蓋經誤證

又東南過徐縣北


地理志曰臨淮郡漢武帝元狩五年置治徐縣王莽更之曰淮平縣曰徐調故徐國也春秋昭公三十年吳子執鍾吾子遂伐徐防山以水之遂滅徐徐子奔楚楚救徐弗及遂城夷以處之張華博物志錄著作令史茅溫所為送劉成國徐州地理志曰徐偃王之異言徐君宮人娠而生卵以為不祥棄之于水濱孤獨母有犬名曰鶡倉獵于水側得棄卵銜以來歸狐獨母以為異覆煖之遂成兒生時偃故以為名徐君

宮中聞之乃是錄取長而仁智襲君徐國後鵠倉臨
死生角而九尾實黃龍也偃王曆之徐中今見有狗
壑焉偃王治國仁義著聞欲舟行上國乃導溝陳蔡
之間得朱弓矢以得天瑞遂因名為號自稱徐偃王
江淮諸侯服者三十六國周王聞之遣使至楚令伐
之偃王愛民不聞遂為楚敗北走彭城武原縣東山
下百姓隨者萬數因名其山為徐山山上立石室廟
有神靈民人請禱焉依文即事似有符驗但世代綿

遠難以詳矣今徐城外有徐君墓昔延陵季子解劍
於此所謂不違心許也

又東至下邳睢陵縣南入于淮

濟水與泗水渾濤東南流至角城同入淮經書睢陵
誤



水經注釋卷八